

ՀԱՄՇԷՆ-«ՀԱՄՇԻԼ»-ՆԵՐ, ՏԵՐՍԻՄ ԵՒ ԻՐԱՔԵԱՆ ՔԻՒՐՏԻՍՏԱՆ

Posted on November 9, 2015 by Keghart



Category: [Opinions](#)



Թղթակից, Պէյրուք, 9 Նոյեմբեր 2015

Նախաձեռնութեամբ Հ.Բ.Ը.Մ.ի վարժարաններու տնօրէնութեան, հայրենասիրութեան ոգիով դաստիարակուող ուսանողութիւնը, անցեալ 3 Նոյեմբերի յետմիջօրէին, Սին Էլ-Ֆիլի Չապել Սոլսէսեան դահլիճին մէջ հանդիպում մը ունեցաւ միջազգային լրագրող Համօ Մոսկոֆեանի եւ համակարգիչներու մասնագետ Վիգէն Թոսունեանի հետ:

Ամբողջ ժամ մը շարունակ, բանախօսութիւնը յատկացուեցաւ Ղրղըզստանի եւ հարաւ-արեւելեան Ռուսիոյ, Թուրքիոյ համշենահայերու ողիսականին, Տերսիմի հայոց եւ Իրաքեան Քիւրտիստանի հերոս հայ գաղթօճախի կեանքին:

Տնօրէն Պրն. Արա Վասիլեան եւ Դոկտ. Պարոյր Աղպաշեան, բանախօսութեան սկիզբը ներկայացուցին Համօ Մոսկոֆեանի վերջին տարիներու գործունեութիւնը աշխարհի բազմաթիւ երկիրներուն մէջ:

Օրուան հիւրը անդրադարձաւ 1944 թ.ին Ղրղըզստանի եւ Ղազախստան արքայութեան Վրաստանի համշենահայերուն մասին: Ան նշեց որ անոնց ղեկավարը՝ Ռուսլան Քարապաճաքով կազմակերպողներէն Է կրօնափոխ եղած «Հեմշիլ»-համշենահայերու վերադարձը դէպի ազատատենչ Արցախ եւ Հայաստան: Համօ Մոսկոֆեան հանդիպումներ ունեցած է Քարապաճաքովի հետ: Բանախօսը նոյնպէս ներկայ եղած եւ նկարահանած է «Համշենական» պատմական հարսանիք մը՝ Ռոստովի եւ Քամիսօ-Շախթինսկի մարզի Ֆետերցովքա գիւղին մէջ:

Ապա՝ խօսուեցաւ նաեւ հայ ժողովուրդի պատմական օրրան՝ Տերսիմի (Տեր Սիմոնի) կրօնափոխ հայերու, ալեւոյի զազաներու եւ արեւապաշտ քղըլպաշներու մասին՝ որոնք նաեւ մեր եղբայրներն ու քոյրերն են: Անոնք, հայերու նման, բազմիցս ենթարկուած են կոտորածներու եւ ցեղասպանութեան:

Մոսկովեան այնուհետեւ անդրադարձաւ Իրաքեան Քիւրտիստանի հայազգի հերոսներուն մասին: Բանախօսը շեշտեց որ անոնք պանծալի էջեր կը գրեն մեր ժողովուրդի արդի պատմութեան մէջ, ղեկավարութեամբ Հավրեգը գիւղէն հրամանատար Մուրատ Վարդանեանի, Իրաքեան Քիւրտիստանի խորհրդարանական Երուանդ Ամինեանի եւ այլոց:

Որպէսզի այս բոլոր տուեալները աւելի հասկնալի ըլլան ուսանողութեան, ցուցադրուեցան հայրենի «Շանթ» եւ «Երկիր» Մետիա ու Լիբանանեան «Future» պատկերասփիւռային կայաններուն հետ լրագրող Համօ Մոսկոֆեանի հարցազրոյցները, ուր կը ներկայացուին նաեւ վերոյիշեալ երկիրներուն մէջ կատարուած նկարահանումներէն տեսարաններ:

Հանդիպման աւարտին, շնորհակալութիւն յայտնելով, Համօ Մոսկոֆեանին եւ Վիգէն Թոսունեանին, որպէս նախկին Յովակիմեան-Մանուկեանի շրջանաւարտ, տնօրէն Արա Վասիլեան խորհուրդ տուաւ ներկայ ուսանողութեան՝ հայրենասիրութեան ուղիով ընթանալ իրենց ամբողջ կեանքի ընթացքին:

Ձեռնարկի աւարտին, հիւրերը պարգեւատրուեցան վարդափունջերով, ապա լուսանկարուեցան ուսուցչական կազմին, տնօրէնութեան եւ ուսանողներուն հետ:

